

UNESCO a reconoce archivo di sclavitud na Aruba como parti di “Memories of the World”

April 16, 2025

Prome Minister di Aruba, mr. Mike Eman, hunto cu Minister di Relacionnan di Reino, Educacion, Hubentud, Innovacion y Deporte, mr. Gerlien Croes, den presencia di dirigentenan di Biblioteca Nacional Aruba (BNA) y Archivo Nacional Aruba (ANA) a comparti cu gran orguyo e noticia historico cu UNESCO oficialmente e acepta e documentacionnan acumula pa BNA y ANA, relaciona cu e historia di sclavitud na Aruba, den su prestigioso registro “Memories of the World”.

Esaki ta un reconocimiento internacional di gran balor pa Aruba. Prome Minister Eman a subraya e importancia cu e archivo aki ta un herencia valioso cu ta forma un parti esencial di nos identidad nacional. ANA y BNA a traha duro pa inventarisa categorisa y digitalisa tur e documentonan relevante, pa haci esakinan accesibel pa henter comunidad. E archivo aki ta completo, den ordo chronologico, bon structura y alineado cu e standardnan di UNESCO.

E historia di sclavitud, colonisacion y e lucha pa autonomia ta refleha den e documento- y relatonan. For di tempo di indjan, colonisacion, y sclavitud, hasta e lucha contra decisionnan tuma pa otro, Aruba semper a muestra un fuerte deseo pa determina su futuro y progreso. Esaki ta parti di nos DNA, nos capacidad pa sobrevivi y desaroya riba nos mes.

Prome Minister a haci referencia na e bishita recien di Secretario di Estado Hulandes, Zsolt Szabó, cu a bishita Museo Arqueologico Aruba, caminda e tambe a reconoce e balor historico di e comunidadnan indigena di Aruba y nan manera ingenioso di sobrevivi y desaroya un pueblo sostenibel.

Na final di e ceremonia, UNESCO a entrega un bandera special na Archivo Nacional Aruba, simbolizando e reconocimiento mundial di e esfuerzo di conserva y duna balor na nos historia. Prome Minister a gradici UNESCO pa su coordinacion, director di ANA drs. Raymond Hernandez, directora di BNA sra. Astrid Britten, y tur esnan cu a dedica hopi tempo y energia pa documenta e historia y trece bek na bida, tanto den exposicionnan como den poema, historia y cancionnan cu ta rebiba nos pasado.

Esaki ta un momento pa celebra pero tambe pa refleha y sigui traha riba un futuro cu ta honra nos pasado y e luchanan cu a trece nos te aki.